



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Epistolarvm Innocentii III. Romani Pontificis Libri Vndecim**

**Innozenz <III., Papst>**

**Parisiis, 1682**

Albanensi Episcopo apostolicæ sedis Legato.

**urn:nbn:de:hbz:466:1-20020**

& præfatam Spirensē Ecclesiam commutatio facta proponitur de communi & libera voluntate, quam carissimus in Christo filius noster Fredericus Siciliæ Rex illustris in Romanum Imperatorem electus obnixè petit auctoritate apostolica confirmari. Ejus igitur precibus inclinati, commutationem ipsam, sicut sine pravitate providè facta est & ab utraque parte sponte recepta, & in ipsarum abbatiarum dispendium non redundat, auctoritate apostolica confirmamus & præsentis scripti patrocinio communimus. Nulli ergo &c. confirmationis &c. usque incursum. Datum Signiæ VII. Idus Septembris, anno XV. I.

GREGORIO SANCTI THEODORI  
Diacono Cardinali apostolicæ sedis Legato.

**G**Rave gerimus & indignum quòd cum jam multòtiens mandaverimus per te Pandimitanæ Ecclesiæ in pastorem de persona idonea provideri, sicut accepimus, mandatum nostrum nondum extitit effectui mancipatum. Nolentes igitur ejusdem Ecclesiæ provisionem ulterius prorogari, si fortè nondum est illi de pastore provisum, venerabilem fratrem nostrum [ Berardum ] Barensem Archiepiscopum, visum, sicut experimento cognovimus, providum & honestum, ac nobis & carissimo in Christo filio nostro Frederico illustri Regi Siciliæ in Romanū Imperatorem electo devotum pariter & fidelem, eidē Ecclesiæ concedimus in pastorem, Capitulo ejusdem Ecclesiæ nostris dātes litteras in præceptis ut eidem tamquam pastori suo intendant humiliter & devotè. Ideoq; discretioni tuæ per apostolica scripta præcipiendo mandāmus quatenus præceptum nostrum sublato cujuslibet contradictionis & appellationis obstaculo facias effectui mancipari, contradictores, si qui fuerint, vel rebelles per censuram ecclesiasticam appellatione postposita compefcendo. Datum Signiæ IV. Idus Septemb. pontificatus nostri anno sextodecimo.

*Scriptum est super hoc Capitulo Panormitano.*

EPISCOPO RATISPONENSI.

**G**Audemus in Domino & in virtutis ejus potentia gloriamur quòd in commisso tibi negotio crucis Christi te laudabiliter diceris exercere ac bene divina cooperante gratia proficere in eodem, caritatem tuam monentes attentius & hortantes quatenus supernæ retributionis intuitu illud, calcatis pro Christi nomine cunctis difficultatibus, taliter exequaris ut cum il-

Tom. II.

lis qui euntes ibant & stebant mittentes semina sua exultationis manipulos valeas reportare. Quia verò propter diei malitiam evectionum numero, quem tibi taxavimus, contentus esse non potes, utpote qui cum eo longè à civitate tua per duo miliaria, sicut tuis nobis insinuasti litteris, procedere non auderes, nos remedium quod contra impedimentum hujusmodi tua providit discretio approbantes, fraternitati tuæ per apostolica scripta mandamus quatenus ubi personaliter negotium exequi nequiveris memoratum, auctoritate nostra, prout ipse cogitasti, committas viris honestis & providis vices tuas. Et quoniam de tuæ circumspectionis modesta fiduciam gerimus pleniorē, taxandi tam tibi quàm illis evectionum numerum quem secundum locorum & temporum qualitatem videris expedire liberam tibi concedimus facultatem, moderamine quod ipse providisti circa eos qui ministrabunt procuraciones, cum res ita videbitur postulare, servato, ut videlicet duarum vel trium aut etiam plurium parrochiarum populis in unum ad audiendum verbum Domini convocatis, eorum Prælati simul, ubi singuli non suffecerint, expensas bajulis verbi Dei exhibeant moderatas. Concedimus etiam ut incendiariis & iis qui manus temerarias in Clericos aut alias personas ecclesiasticas injecerunt, volentibus suscipere signum crucis, satisfactione injuriarum exhibita competenti, auctoritate nostra munus absolutionis impendas, nisi forsan aliquorum excessus adeo graves existerent & enormes quòd merito essent ad sedem apostolicam transmittendi. Ad hæc, omnes qui, te circa hujusmodi negotium occupato, possessiones aut alia Ecclesiæ tuæ bona temerè præsumperint invadere vel turbare, in quacunque fuerint diocesi constituti, tibi liceat appellatione remota per distractionem ecclesiasticam coercere. Taliter ergo in omnibus exhibere te studeas prudentem, sollicitum, & modestum quòd per hoc crescas & nomine apud homines & merito apud Deum, nosque fraternitatem tuam magis ac magis apostolica prosequamur gratia & favore. Datum Signiæ IV. Idus Septemb. pontificatus nostri anno sextodecimo.

ALBANENSI EPISCOPO  
apostolicæ sedis Legato.

**C**VM causam super postulatione de venerabili fratre nostro Heracliensi Archiepiscopo & electione de dilecto filio

IIiii

Epist. 112.  
De electione  
Patriarche  
Constantinop.

Epist. 110.  
Transfert Archiepiscopum Barensem ad Ecclesiam Panormitanam.

Epist. 111.  
De numero evectionum.



Plebano sancti Pauli de Venetiis in Constantinopolitana Ecclesia celebratis dilecto filio magistro Maximo Notario nostro duxerimus committendam, & idem proficiscens usque Venetias in negotio pro parte processerit, quia tamen per Venetias Constantinopolim transitum habere non potuit, causam ipsam tuæ fraternitati, de qua plenè confidimus, duximus committendam, per apostolica tibi scripta mandantes quatenus in eadem secundum formam comprehensam in litteris directis ad eundem magistrum appellatione remota procedas. Tu denique, frater Episcopo, super te ipso &c. Datum Signiæ x i v. Kal. Octobris, pontificatus nostri anno sexto-decimo.

PRIORI ET CONVENTUI  
Camaldulensibus.

Epist. 113.  
De reformatione monasterij de Vangadicia.  
Vide supra epist. 16. & lib. 2. hist. Camaldul. pag. 282. & 57

CVm dudum ad correctionem & reformationem monasterij de Vangadicia laborantes proficere non possemus, nec hujusmodi Babylon, quam studio multo curavimus, ad sanitatem ullatenus perveniret, quin immo ejus computruissent adeo cicatrices ut earum factor etiam laicos ad naufragium provocaret, demum attendentes ferro debere vulnera refecari que fomentum non sentiunt medicinam, venerabili fratri nostro Nicolao Reginensi Episcopo, tunc electo, & dilectis filiis Priori sancti Georgij & Ventura Subdiacono nostro Canonico Veronensi dedimus in mandatis ut tam E. quondam ejusdem loci Abbatem, qui à regimine ipsius nostra fuerat auctoritate amotus, quam etiam monachos universos per alia monasteria collocantes, virum aliquem religiosum, bonæ opinionis & vitæ, sollicitum in spiritualibus, & in temporalibus circumspexit, monasterio præficerent antedicto, qui secum viris prudentibus & religiosis assumptis monasterium ipsum spiritualiter & temporaliter reformaret. Qui mandatum apostolicum fideliter exequentes, dilectum filium S. domus vestræ de Verona Priorem, virum utique providum & honestum, ipsi monasterio præfecerunt, injungentes eidem ut ad minus duodecim viris idoneis de ordine vestro assumptis, ad ejusdem reformationem intenderet sollicitè ac prudenter; nobis nihilominus per suas litteras quod fecerant intimantes, ut eorum processus per approbationem nostram stabilitatem debitam fortiretur. Volentes igitur sic ejusdem monasterij reformationi ac statui providere quòd ex hoc juri apostolicæ

sedis, ad quam nullo medio pertinet, minime derogeretur, de fratribus nostrorum consilio ipsum Priorem concedentes dicto monasterio in Abbatem, liberam ejusdem monasterij correctionem & plenam tibi, fili Prior, & successoribus tuis duximus committendam; ita tamen quòd qui pro tempore fuerit electus ibidem, Romano Pontifici præsentetur, ab eo confirmationis & benedictionis gratiam recepturus; ad cujus amotionem, si quando propter excessus suos fuerit amovendus, inconsulto Romano Pontifice nullatenus procedatur. Datum Signiæ v i i. Kal. Octobris, pontificatus nostri anno sextodecimo.

In eundem serè modum scriptum est Reginensi Episcopo, Priori sancti Georgij, & V. Subdiacono nostro Canonico Veronensi, verbis competenter mutatis, usque nullatenus procedatur. Ideoque discretioni vestræ per apostolica scripta mandamus quatenus monachos qui adhuc in præfato monasterio commorantur in aliis monasteriis recipi facientes, in corporalem possessionem ipsius prædictum inducatis Abbatem, & ad reformationem ejusdem opportunum impendentes sibi consilium & favorem, faciatis ei de ipsius monasterij justitiis ab ejus fidelibus & subditis plenariè responderi; contradictores, si qui fuerint, vel rebelles per censuram ecclesiasticam appellatione postposita compescendo. Quòd si non omnes &c. tu frater Episcopo &c. Tu denique, frater Episcopo, super te ipso &c. Datum ut supra.

NOBILI VIRO COMITI

\* Guidoni, spiritum consilij senioris.

\* Casertanensi

CVm tuum in multis offenderis redemptorem, & traditam tibi potestatem ab ipso multotiens contra eum præsumperis exercere, deberes saltem in vitæ vespera constitutus tuæ delicta corrigere juventutis, & Domini faciem in confessione oris & satisfactione operis taliter prævenire ut in tremendi necessitate judicij ab ipso, qui reddet singulis secundum opera sua, posses indulgentiæ gratiam expectare. Tu verò, quod dolentes referimus, necdum à via mala cohibes pedes tuos, sed quasi propriæ salutis curam ac divini nominis timorem abjeceris & amorem, contempta Dei patientia, qua, quantum in ipsa est, ad poenitentiam te adducit, confusionem tibi thesaurizas & iram, religiosos viros, quorum patrocinium tibi deberes beneficiis & obsequiis comparare, ut apud Dominum allegarent

Epist. 114.  
Vt à Camaldulensium injuriis abstinere.  
Vide lib. 2. hist. Camaldul. pag. 282.